

2019

AÑA DI FAMIA Y
DI CUIDO DI NOS
MUCHANAN

Diaranson 9 October 2019

ISLA(•)ONLINE

Email: prensa@arubagovernment.aw Tel: 528-4900



OCTOBER, LUNA DI CONSCIENTISACION DI CANCER NA PECHO

ISLA ONLINE
NOTICIA DI GOBIERNO



MINISTER EVELYN WEVER-CROES

PROME MINISTER DI ARUBA



Gobierno di Aruba a yega na acuerdo cu Citgo ARUBA TA HAYA YABI DI REFINERIA Y TERMINAL BEK



Durante un conferencia di prensa extra ordinario, Premier Evelyn Wever-Croes hundo cu coleganan minister, a informa prensa y comunidad di e bon noticia cu a logra yega na un acuerdo cu e refineria pa Aruba por haya e yabi di e refineria y e terminal for di Citgo. Esaki ta pa permiti Gobierno di Aruba busca otronan cu ta interesa den opera e terminal y e waf, y e refineria tambe. Mes momento ta garantisa derecho di trahadonan di e compania. Apesar cu no ta empleadonan di Gobierno, Gobierno di Aruba a insisti pa e derechonan di e trahadonan wordo salvaguardia tur momento.

REFINERIA

Cu e firmamento di e MoU, Gobierno di Aruba por cuminsa negocia cu otro partidonan interesa. Ya caba tin un lista di mas di 25 compania cu a expresa nan

interes den ultimo tempo, sinembargo Gobierno no por a negocia cu nan, pa haya sa si nan ta partnernan serio. Awor si esaki ta posibel. Gobierno lo no limita su mes na e lista di compania aki so. Gobierno lo bay busca activamente na mas inversionista, entre otro door di tene un road show na Houston, caminda tin inversionistanan serio, pa lanta nan interes pa inverti na Aruba. E comision encarga cu negosacion lo wordo formalisa dentro di poco. Riba peticion di sindicato, empleadonan tambe lo wordo envolvi den e proceso aki. Gobierno ta buscando un partner serio, cu tin e fondo pa inverti mesora den e refineria, pa hasi'e un refineria 'state of the art', cu ta cumpli cu standardnan medioambiental, cu ta paga su fair share na caha di Gobierno, y cu ta trata su empleadonan bon.

TERMINAL Y WAF

Cu e firmamento di e MoU, Gobierno ta haya control di e waf y di e tankinan. Tur hende ta corda e bon temponan di Wickland Oil, cu a opera e tankinan cu hopi ganashi. Citgo ultimo tempo a neglisha e tankinan. Y apesar cu nan falta hopi mantencion, nan tin un balor hopi halto. Gobierno di Aruba ta bay percura pa e negoshi aki bira uno hopi exitoso cu ta genera hopi entrada pa Gobierno, y cu lo crea hopi cupo di trabou.

EMPLEADONAN

E punto di salida di Gobierno ta cu tur empleado mester keda cu nan trabou,

en todo caso mas tanto empleado posibel, bou di e operador nobo. Citgo a indica anteriormente cu tanten cu no ta sigur si empleadonan lo wordo tuma over pa e operador nobo, y Citgo mester paga nan cu tur nan aña di servicio, cu Citgo no tin placa pa esey. Sinembargo aki e forsa di negosacion di Gobierno a hunga un rol grandi, y a pone como condicion mas importante pa Citgo cu nan mester paga tur loke nan debe na trahadonan, contratistanan y otronan cu nan debe. Premier Evelyn Wever-Croes a indica cu e empleadonan ta importante pa Gobierno y nan interesnan mester bin na prome luga.

Gobierno di Aruba ta hopi contento cu e bon noticia aki, cu a yega net na un bon momento. Pasobra mientras cu CAFT ta insisti cu Gobierno mester tuma medida, Gobierno di Aruba ta scoge pa busca alternativanan economico, pa cera e gap financiero, y e hecho cu ta haya e yabi di e terminal y e refineria, ta un di e alternativanan ey. Den nombra di Gobierno, Premier Evelyn Wever-Croes a gradici e comision cu a negocia fuertemente cu Citgo, y a logra e logro importante aki. Tambe Prome Minister a gradici colega Ministernan y pueblo di Aruba pa e confiansa y sosten.

Gobierno di Aruba ta felicita pueblo di Aruba pa e bon noticia aki, cu ta muestra cu si bo tin determinacion, y bo ta kere den un causa, bo por realis'e.



PABIEN ARUBA



ARUBA TA HAYA YABI DI REFINERIA Y TERMINAL BEK

GOBIERNO DI ARUBA TA FELICITA
PUEBLO DI ARUBA PA E BON NOTICIA AKI,
CU TA MUSTRA CU SI BO TIN DETERMINACION
Y BO TA KERE DEN UN CAUSA,
BO POR REALIS'E.



MINISTER OTMAR ODUBER

MINISTER di Desaroyo Teritorial, Infrastructura y Medio Ambiente



ROTONDE DI NOORD A HABRI

Minister di Infrastructura sr. Otmar Oduber conhumente cu Director di DOW diamars atardi a anuncia cu ta habri e rotonde na Noord. Esaki ta forma parti di e hecho cu poco poco ta yegando mas cerca di e availability date di e proyecto Watty Vos Blvd.

Comunidad por a mira y experiencia cu ultimamente cada siman tin mas alivio den e presion di trafico. Esaki ta debi na camindanan cuta termina y rutanan cuta bira accesibel. E trabou cu a tuma luga na e sitio (Rotonde Noord) tabata uno grandi pa cual cada biaha cu awa a yobe, el a accentua puntonan di atencion, cual a haci cu adaptacionnan a keda wordo haci pa e trabou por keda bon. Na dado momento despues cu e duiker a cay durante construccion, mester a prolonga e habrimento di e rotonde pa drecha e duiker completo.

Pa locual ta mantenimento, Minister Oduber a splica cu: 'Mota Engil ta esnan cu lo ta encarga pa mantene e proyecto pa e proximo añanan, cual ta encera e marcacionnan riba caminda pa e keda visibel pa nos automobilistanan. Ta spera cu aki dos pa tres siman lo por habri e Avenida completo, despues fin di año percura pa e parti di embeyecimento cu mester tuma luga.' Kico comunidad por spera?

Pa resumi, den e proximo simannan comunidad lo bay experiencia un alivio grandi den trafico, cual pa mas cu dos año caba a bin ta sufriendo hopi. DOW cu na varios ocasion tabata topico di discusion di pueblo, hopi bes a reuni y evalua con por suavisa e presion cu comunidad tabata sinti. Pesey den nomber di Gobierno di Aruba y DOW, ta gradici comunidad pa e comprension cu tabatin den e proceso di construccion.





Fase 2 di Embeyecimento y renobacion rond di Misa Oranjestad ta continua TA INICIA CU TRABOUNAN PA MEHORA INFRASTRUCTURA DI PARADA DI BUS DILANTI MISA DI PLAYA

Diamars mainta trempan Minister Otmar Oduber acompaña pa director di DOW sr. Marlon Croes a duna splicacion di e proyecto di renobacion di misa Oranjestad cual su prome fase a encera embeyecimento rond di e misa. E Segundo fase di renobacion di Misa Oranjestad ta encera mehoracion di e infrastructura di e parkinglot dilanti di e misa pa crea mas eficiencia den e trafico y mihor sitio pa e autobusnan staciona. Ademas lo percura pa crea un parada di bus cu dak y espacio pa sinta pa personanan por warda pa bus den un ambiente mas comodo y agradabel. Tur esaki den cuadro di eleva e calidad di bida di nos hendenan.

Siman pasa e misa San Francisco a celebra su 100 año akinan na Aruba, pa cual ta felicita Pastor y comunidad pa ese. Pa locual ta e trabounan infrastructural cu ta tumando luga conhumente cu DOW. Mas o menos dos luna pasa, trabounan a cuminsa rond di e Cathedral San Francisco como parti di elevacion di calidad di bida di hende. Mientras cu ta terminando e prome fase, Minister Oduber a anuncia e inicio di e segundo fase cu ta encera e desaroyo di e parkinglot otro banda di caminda di e misa caminda cu autobusnan ta para. Pa prepara esaki mihor pa e autobusnan por parkeer. Tambe lo percura pa tin espacio cu dak pa esnan cu ta warda bus tambe por sinta mas comodo. Despues lo inicia cu e planificacion di embeyecimento di tur e adernan di caminda cu ta conecta na centro di ciudad. Tur esaki den cuadro di eleva e calidad di bida di nos hendenan.

Minister Oduber a splica tambe di otro trabounan tumando luga, manera e misa na Santa Cruz cu a wordo drecha, Misa na Paradera cual ya a inicia cu un destaho y ta calcula cu pa otro siman e trabounan lo inicia cu ta encera e embeyecimento y mehoracion di e infrastructura tur rond di e misa y e parkinglot pa crea mas eficiencia den e trafico. Ademas, e intencion ta tambe pa inicia cu trabounan pronto na Misa Santa Teresita na San Nicolas. Pa conclui, Minister Oduber a splica cu ta spera cu prome cu fin di año e trabounan aki ta finalisa.





MINISTER XIOMARA RUIZ-MADURO

MINISTER di Finansa, Asuntonan Economico y Cultura



Stichting Rancho: ACTIVIDAD NAN DEN LUNA DI OKTOBER!

Tayer di Boto Miniatura:

Ta tuma lugar na Centro di Bario Playa Pabou, tur diasabra mainta 9.00AM (registron ta cuminsa 8.30AM) den luna di oktober y november.

Hoben: Edad 12-18 año (max 10 participante)

Muher: Edad 18+ año bai ariba (max 10 participante)

Homber: Edad 18+ año bai ariba (max 10 participante)

Pa esnan cu ta interesa pa participa ainda tin lugar. Diasabra awor ta bo oportunidad pa inscribi. Participacion ta gratis! www.stichtingrancho.org

con pa rima, wak documentario of pinta riba CANVAS (5,- pa un)

7.00PM - Conoce mi Conece Bo: Rima den grupo (den aire liber), presentacion of Artist Talk!

8.00PM - 9.00PM - OPEN MIC! Rima Session!

Abo ta cla pa desaroya bo talento nan, Expresa bo pensamentonan den un manera creativo/? Bo gusta rap, skirbi letra of traha arte. Yega! bo ta keda invita. Pa mas informacion contact. Ginelly: +297 661 7671 of centrodiactividadrancho@gmail.com

Pa kiko Rancho?

En conexion cu 3 año di existencia di Centro di Actividad Rancho, Fundacion Rancho lo organiza un anochi di informacion pa comunidad di Aruba. Lo habri e anochi cu un charla duna pa Sr. Clifford Rosa cu topico "Pa Kiko Rancho?", Durante a charla aki lo purba di contesta e pregunta importante aki usando contesta/feedback di e publico presente.

Atraves di charla lo sigui cu presentacion visual duna pa Sra. Ginelly Quandt cu lo enfoca riba e proyecto "Centro di Actividad Rancho", meta, funcion y actividadnan den 2019.

Boluntarionan, stakeholders, partners y comunidad ta keda invita pa participa dialuna dia 14 di Oktober pa 7 'or di atardi na (CAR) Centro di Actividad Rancho. Koningstraat 38, Oranjestad. Y asina siña un tiki mas di nos Fundacion (NGO) cu tey pa Conserva e Cultura y Historia di e Bario di Rancho.

Tuma e oportunidad aki pa inscribi como boluntario of pasa busca bo I LOVE RANCHO sticker! Bar y cushina bon surti!


<https://www.facebook.com/events/674353409722061/>

Rima Session

Ta un actividad unda abo como fanatico di Hip Hop lo sinti bo mes na cas. Participa den e OPEN MIC (esaki lo wordo graba) y mustra bo talento nan na comunidad di Aruba. Programa ta lo siguiente:

6:00PM - Analisa letra di artista nan local y internacional, Siña

HIP HOP + WORKSHOP + SCRIBI LETRA
RAP Y PERFORM



RIMA SESSIONS

Open mic for everyone who loves Hip Hop age 15+



GRATIS | FREE

TUR DIARASON | 6 PM TO 9 PM |
CENTRO DI ACTIVIDAD RANCHO
KONINGSTRAAT 38, ORANJESTAD ARUBA

Hip Hop un cultura lage inspira bo, conoce hende, trece bo ideanan dilanti, scribi letra, bayla of rap.

Expressa bo mes!



MINISTER RUIZ-MADURO LO ATENDE E FALL MEETING ANUAL DI IMF

Otro siman Minister Ruiz-Maduro lo ta na New York y Washington pa reuni cu algun inversionista y pa atende e Fall Meetings di Fondo Monetario Internacional (IMF) y Banco Mundial (WGB).

E reunion aki ta un reunion anual di IMF/WGB den cual bankeran, ministernan di finansa, ehecutivonan di sector priva y academiconan ta bini hunto pa debati riba topiconan di interes, manera economia mundial, eliminacion di pobreza y desaroyo economico.

Tambe e mandatario lo asisti na algun seminario tocante economia global, desaroyo internacional y sistema financiero mundial.



CONSERVING THE TRADITIONAL ARUBAN MINIATURE BOAT

United Nations
Educational, Scientific and
Cultural Organization

Aruba
National
Commission
for UNESCO

**Tayer di
Boto
Miniatura
Crioyo**

INSCRIBI AWOR
PARTICIPACION TA GRATIS!
WWW.STICHTINGRANCHO.ORG

f
g
o



MINISTER ANDIN BIKKER

MINISTER di Husticia, Seguridad y Migracion

ARUBA TA HUNGA FUTBOL CONTRA DI CORSOU Y HULANDA DEN TORNEO DI REINO NA BONEIRO

E team di Aruba cu ta participante den Torneo di Reino na Boneiro a hunga dos partido di Futbol. Diamars atardi Aruba a hunga contra e team di Corsou y aki e team di Corsou ta gana e team di Aruba cu e score di 7-0. Diaranson mainta e weganan di Baseball cu mester a tuma luga entre Aruba y Sint Maarten a keda cancela pa motibo di awasero. Parti atardi a tuma luga un partido di Futbol entre Aruba y Hulanda y e score final ta cu Hulanda ta gana Aruba cu e score di 5 pa 3.

Torneo di Reino ta ser organisa tur aña den luna di October conhumentamente cu Ministerio di Husticia di Hulanda/Boneiro Aruba, Corsou y Sint Maarten cu ta cay bou di Stichting Laurens cu su presidente Prins Pieter Christiaans van Oranje. Torneo di Reino ta conoci bou di diferente lema, por ehempel Hulanda y Boneiro ta e lema "Alleen jij bepaalt wie je bent", Aruba "Bo futuro ta den bo man", Corsou "Ami mes y mi logronan" y Sint Maarten "I am my own Icon". Tur participante mester ta entre e edad di 12 pa 15 aña y nan mester a sigui un programa di 10 luna pa mehora nan comportacion y disciplina.

Mañan diahuebs 11 di october ta final di Torneo di Reino. Riba combinacion di e potretnan por mira nos muchanan yen di animo cu nan participacion na Torneo di Reino 2019 na Boneiro.



RESUMEN DI SIMAN DI MINISTERIO DI HUSTICIA, SIGURIDAD Y INTEGRACION BOU ENCARGO DI MINISTER MR. ANDIN BIKKER

30 SEPT - 4 OCT, 2019



Resumiendo e siman di Minister di Husticia mr. Andin Bikker, diaranson 2 di october Minister Bikker a bay felicita cinco hubilario na Kazerne di Bombero. Ta trata di cuater bombero cu a cumpli 40 año den servicio y Sra. Maduro cu a cumpli 30 año trahando na Brandweer. Minister Bikker a gradici cada un di nan pa nan trabou y servicio enorme duna na Pueblo di Aruba.



Diamars tambe, Minister Bikker hunto cu Comandante di Brandweer Sr. Eduard de Cuba a pasa cerca un grupo di hoben cu a cuminsa nan opleiding pa bombero prome di October. Apesar cu tin reto financiero, Minister Bikker a haci tur esfuerzo pa cuminsa cu un klas pa train bombero. Despues di basta año

porfin ta bay haya 12 hobennan dinamico y cu hopi gana pa sigui nan opleiding y brinda nan servicio na Pueblo di Aruba.



Diahuebs mainta 3 di oktober, Minister di Husticia mr. Andin Bikker durante un conferencia di prensa a anuncia cu Aruba ta participa na Torneo di Reino 2019 na Boneiro. E torneo ta organisa conhuentamente cu Ministerio di Husticia di Hulanda, Aruba, Corsou y Sint Maarten y ta cay bou di Stichting Laurens cu su presidente Pieter Christiaan van Oranje. Na e Torneo cada pais participante tin nan lema y di Aruba ta, "Bo futuro ta den bon man". Hobennan di edad 12 pa 14 año lo representa Aruba den tanto Futbol como Baseball otro siman di 6 pa 11 di October.



Minister di Husticia mr. Andin Bikker diabierna mainta tabata presente na entrega di premio na 12 mucha cu a gana den e curso di pintamento pa scolnan basico cu a hiba e lema "I Love my Pet". Minister Bikker despues di a mira tur e pinturana ganado a keda impresiona con hopi talento tin na un edad asina hoben. Den discurso di Minister Bikker na tur presente a bisa cu e pintamento ta e prome paso pa duna contenido real na e Ley di Cacho y cu Gabinete Wever Croes a haci compromiso cu pasonan firme pa pronto introduci e ley cu un par di año tras a pasa den Parlamento.



MINISTER DANGUI ODUBER

MINISTER di Turismo, Salud y Deporte



FASE 1 TA CLA Y FASE 2 TA DEN PREPARACION MINISTER DANGUI ODUBER TA CONTENTO CU DESAROYO NA EX BUSHIRI BEACH

Tur persona cu pasa den e area di ex Bushiri Hotel por mira cu trabounan ta avansando y bayendo full speed pa loke ta trata e creacion di un beach nobo cu lo sirbi di atraccion tanto pa turista como local. Minister Dangui Oduber, mandatario encarga cu turismo ta contento y satisfecho con e desaroyo ta canando, tumando na cuenta cu ya Fase 1 a termina.

"Na e momento aki nos por mira cu e prome fase ya a keda realisa. E prome fase tabata encera ponemento di santo blanco. Esaki ta haci cu e beach aki lo sirbi dibiahia manera localidad pa e evento magno di Aruba Beach Tennis", Minister Dangui Oduber a expresa na cuminsamento. E mandatario a continua ta splica cu e desaroyo aki ta uno esencial, ya cu e ta un stap pa concretisa locual ta bay bira e Aruba Port City.

Segun Minister Dangui Oduber a duna di conoce, e inversion pa realisa e proyecto aki ta bin for di A.T.A. conhuntamente cu DOW. Riba nivel gubernamental, Minister Dangui Oduber ta bisa cu esaki ta bayendo den bon cooperacion cu colega Otmar Oduber. E mandatario a duna di conoce cu e di dos fase, cual lo inicia pa aña 2020, ta uno mas prometedor, ya cu e lo duna forma na e proyecto.


Minister Dangui Oduber: "Fase 2 ta e fase cu lo duna un bida na e area. Esaki ta encera cu lo crea e facilidadnan, lo haci e landscaping, pone areanan di parkeo, pone cafes y hopi mas. E resultado final



bira uno di kita sombre manera ta ser bisa den Papiamento crioyo."

Finalmente e mandatario ta duna danki na tur persona envolvi den e proyecto aki y cu ta trahando di forma incansabel

pa haci esaki realidad. "Un biahia mas ta ser demostra cu un vision coherente y un maneho serio cu Aruba na pecho, ta e formula pa resultadonan positivo pa nos pais", Minister Dangui Oduber a bisa na final.



INFORMACION DI VIVIENDA PA STUDIANTENAN CU KIER STUDIA DEN REGIO BRABANT Y LIMBURG



Mentor di Arubahuis sra. Swinda Venhorst-Thijssen ta brinda informacion tocante vivienda pa e studiantenan cu ta pensa di bay studia na e ciudadnan Tilburg, Breda, Den Bosch, Eindhoven, Maastricht, Sittard y Heerlen. E studiante cu ta pensa di bay studia na Hulanda mester tene cuenta cu mester inscribi na tempo pa vivienda. Como mentor mi tarea ta pa duna e infor-macion necesario over mi regio con pa yega na un camber a base di un bon contract y cu ta pagabel.

Den e articulo aki mi ta duna e websitenan pa inscribi y busca vivienda. Si ta duda ainda riba cua opleiding of ciudad, inscribi na diferente website y despues bo ta haci escohencia. Via di woningcorporaties por inscribi pa haya vivienda special pa studiante. Den caso cu mester yena postcode riba e inschrijfformulier pa kamber por yena un postcode fictivo. Aruba no conoce e sistema di postcode. Ora kies di un opleiding y scol por check tambe si tin posibilidad pa haya un camber via di e scol, sea pa un año of mitar año. Via di un makelaar nan kier den mayoria ocacion pa bo ta presente pa regla e camber.

E prijsnan via makelaar tambe ta mas caro y tin scarsedad den luna di juli y augustus. Pagamento for di Aruba pa un vivienda via un makelaar of particulier lo keda un risico. Mi preferencia y conseho segun mi experiencia ta pa un areglo di camber via un woningcorporatie of via scol. Tin ora ta preferibel reaccionar



riba un studio pa evita e sistema di hospiteren, cu ta encera cu e demas studiantenan riba e piso ta scoge ken ta esun biba eynan mag escoge e . Y nos studiantenan casi no ta wordo escohi.

Door cu e distancianan entre Tilburg, Bre-da, Den Bosch y Eindhoven no ta grandi por biba den un ciudad y studia den un otro ciudad. Esey ta haci e posibilidad mas grandi pa haya un camber. Igualmente ta e caso den Limburg entre Maas-tricht, Sittard y Heerlen. Despues por move pa e studiestad mes. E conseho ta pa check e website-nan bon y tuma bon nota di e proceduranan, reglanan y deadlines.

Continuacion Pagina 14**Websitenan pa busca vivienda regio Brabant y Limburg:****TILBURG**

1. www.klikvoorkamers.nl (inschrijftijd ta bepalend, gratis inschrijven)
2. www.sshxl.nl of www.talentsquaretilburg.nl (inschrijftijd ta bepalend)
3. Fontys Hogescholen: <https://fontys.edu/Practical-information-24/Arriving-in-the-Netherlands/Accommodation-28.htm> Meld aan via Accommodation form location Eindho-ven and Tilburg di Fontys entre 1 mei y 15 juni 2020 (Deadline)
4. Kamerbemiddeling Tilburg: www.kamerbemiddelingtilburg.nl

Un bemiddelingsbureau cu hopi posibilidad pa camber y nan tin studio tambe. Online tin un bista direct y basta amplio y duidelijk na informacion. Inschrijfgeld ta 47,50 euro eenma-lijc cu por wordo paga via Ideal of Creditcard. Nan huurprijsnan ta val mee y ta inclusief, dus cu servicekosten: awa, corriente y gas. Borg ta 1x huurprijs. Nan no tin wachttijd pero mester reageer lihe paso tin hopi interes pa e cambernan, vooral door di studentenan inter-nacional. Advies ta pa schrijf in no mas laat cu april 2020.

BREDA

1. www.klikvoorkamers.nl (inschrijftijd ta bepalend, gratis inschrijven)
2. www.easystreetstudent.com (inschrijving tambe via www.klikvoorkamers.nl (inschrijf-tijd ta bepalend, gratis inschrijven))

DEN BOSCH

1. www.brabantwonen.nl of www.studentroomsbrabant (via loting)

Na Den Bosch tin un sistema nobo pa aplicar a studentenwoning. Inschrijfgeld ta 10 euro. Tin risico door cu ta via loting. Pesey e advies ta pa inscribi pa camber na Tilburg, dus stu-dia na Den Bosch y biba na Tilburg. Distancia: trein 15 minuut.

EINDHOVEN

1. www.vestide.nl (inschrijftijd ta bepalend, gratis inschrijven)
2. Fontys Hogescholen: <https://fontys.edu/Practical-information-24/Arriving-in-the-Netherlands/Accommodation-28.htm> Meld aan via Accommodation form location Eindho-ven and Tilburg di Fontys entre 1 mei y 15 juni 2020 (Deadline)
3. www.holland2stay.com

MAASTRICHT

www.maastrichthousing.nl (inschrijftijd ta bepalend) biba na Maastricht y studia na Maastricht, Sittard of Heerlen

SITTARD

1. www.woonpunt.nl (inschrijftijd ta bepalend) via www.maastrichthousing.nl

HEERLEN

1. www.wsdevoorzorg.nl (inschrijftijd ta bepalend)
2. www.grandstudenthall.com (Biba na Heerlen y studia na Maastricht, Sittard of Heerlen)

Pa pregunta contact mentor Swinda Venhorst-Thijssen via email na:
swindavenhorstthijssen@hotmail.com of telefoon 0031653 51 89 58 (whatsapp)

Por tuma contact tambe direct cu e instancianan menciona tambe si tin cuaquier pregunta.





Integridad TA

- ✓ Ora un persona su actitud ta cuadra cu loke e ta bisa.
- ✓ Ora un persona no ta tuma algo cu erroneamente bo ta dun'e (por ehempel na cahero bo ta haya placa dimas bek y bo ta informe di biaha di su fout).
- ✓ Un persona cu ta cumpli cu palabacion haci.
- ✓ Si un persona ta duda cu algo ta corecto, e ta disidi pa discuti esaki cu un otro persona prome cu e tuma un decision.
- ✓ Mantene confidencial informacion risibi di otro persona den confiansa.
- ✓ Nenga di ricibi pago di cliente bou di mesa, pa ehecuta bo tareanan como funcionario publico.
- ✓ Ora un miembro di un Hunta di Comisario ta evita conflicto di interes.
- ✓ Ora como lider bo ta transparente den bo proceso di tuma decision y bo ta actua conforme norma y balornan valido den comunidad.
- ✓ Ora como sirbido publico bo ta humilde.

Hunta Nos ta crea Integridad





Integridad NO TA

- ✗ Ora cu un persona ta gaña.
- ✗ Ora cu un persona ta wak su colega haci algo robes, y no ta bise nada.
- ✗ Ora cu un persona ta abusa di su poder y autoridad.
- ✗ Ora cu un sirbido publico ta uza su funcion no pa bienestar general, pero su propio interes personal.
- ✗ Ora cu un persona no ta respeta ni balora integridad di otro hende.
- ✗ Ora cu un persona ta haci algo bon, pero cu mal intencion.
- ✗ Ora cu un persona ta sconde e berdad.
- ✗ Ora cu un persona ta bisa "a" mientras e ta haci "b".
- ✗ Ora cu un persona no ta confiable.
- ✗ Un lider cu ta kere cu niun ley of regla ta aplicable p'e como cu e ta kere cu e ta omnipotente.
- ✗ Un persona cu ta neglisha su trabow ("job"), na favor di su trabow na banda ("side job").

Hunto Nos ta crea Integridad





GOBIERNO DI ARUBA

an
Feliz Dia

ISLAONLINE
PA INFORMACION
CORECTO Y BERDAD

Gabinete Wever-Croes